



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Septem Illustrium Virorum Poemata**

**Amstelodami, 1672**

Ad Aurelium Marrochium, Scipionis Card. S. Susannae Medicum.

**urn:nbn:de:hbz:466:1-11215**

A D

AURELIUM MARROCHIUM,  
 SCIPIONIS CARD. S. SUSANNÆ  
 M E D I C U M.

**H**Oc tibi me, Aureli, vestrum quoque numen Apollo  
 Sollicitum jussit mittere epistolum :  
 Artis ut auxilio, quam tu meditaris, & unam  
 Eximiè, præstanti excolis ingenio,  
 Nascenti occurras morbo, longumque minanti,  
 Ni reprimas, toto corpore supplicium.  
 Ex quo etenim Domini vos mollia jussa secuti  
 Urbe procul dulci vivitis exilio,  
 Et miserâ ambitione procul, dulcissima, forsitan  
 Immemores nostri, gaudia percipitis ;  
 Hic mihi nescio quæ trepido submittitur imis  
 Visceribus tristis fœdaque pernicies.  
 Nam vapor effusus ferventibus undique venis  
 Incipit indignis urere membra modis.  
 Jamque vari passim existunt, papulæque rubentes,  
 Inficit & medias pustula rupta manus :  
 Pruritusque vagi, & scabræ rubiginis optat  
 Assiduo impatiens stringier ungue cutis.  
 Præsertim dulces ubi suadent carpere somnos  
 Aurea jam cursu sidera præcipiti,  
 Sanguis inardescens stimulis pertentat acutis :  
 Nec requies molli mi datur ulla toro.  
 Vixque renascentis Phœbi sub lumina prima  
 Excipit irriguo sparsa sopore quies.

Unde

Unde autem infelix vitium incessisse repente,  
Et miseros artus corripuisse putem?  
Non ego cum flammis Procyon, radiosque malignos  
Spargeret, aut mihi luce sub Erigones,  
Pocula ficcavi generosi ardentia Bacchi  
Largius, appositæ nec nocuere dapes.  
Dira neque immodico bilis succensa labore,  
Nec cura aut studio est mens agitata gravi.  
Sed molles aluere epulæ, cyathisque minutis  
Infusa est gelido plurima lympha mero:  
Et matutini captato frigore roris,  
Mox vacui longos sedimus usque dies.  
Nec dubitavi etiam mersare salubribus undis  
Interdum, ac tepido spargere membra lacu.  
Quid, liquidum, medioque agitatam Aquilonibus æstu  
Quod cælum in tectis ducimus æriis!  
Ipse tamen quæ causa malum hoc induxerit, altè  
Vestiga, & celerem, dum licet, affer opem.  
Affer opem, & propera labem compescere, si te  
Ulla movent dulcis jura sodalitiis.  
Seu sit abundanti salientem sanguine venam  
Tundere opus, succosque elicuisse putres;  
Seu jecore ardenti ingesto medicamine flammam  
Opprimere, atque alvum ducere consilium est;  
Huc ades, Autumnus labentis dum finit hora  
Lenis adhuc, dum sic fera moratur hiems.  
Quam cupimus debere tibi, molire salutem,  
Conceptumque ægro pectore pelle metum.  
Eveniet: tibi perpetuò sic vota secudent,  
Et faveant cœptis numina læta tuis:  
Principis & magni viridi dent robore vitam  
Proferre ad Pili tempore longa senis.

A D